



Fréttabréf Flataskóla

2. tbl. 23. árg. desember 2007

Aðventuguðspjónusta

Sunnudaginn 16. desember kl. 11:00 verður hin árlega aðventuguðspjónusta í Vídalínskirkju fyrir nemendur, foreldra og starfsfólk Flataskóla. Þar munu nemendur skólans koma fram og aðstoða við guðspjónustu með tónlist, upplestri og helgileik. Við hvetjum nemendur og fjölskyldur þeirra til að taka þátt í guðspjónustunni.



Kirkjuferð

Sú hefð er í Flataskóla að allir nemendur ásamt kennurum fara í Vídalínskirkju á aðventunni. Miðvikudaginn 12. desember verður farið til kirkju. Vinabekkir munu fara saman.

Stór stafur og lítill

Stór stafur og lítill -
hvort á ég að skrifa?
Það hef ég ekki hugmynd um
svo ég bulla bara eitthvað.
Hvers vegna að hafa þessar reglur?
Ef ég mætti ráða myndi ég hafa
húsin röndótt og doppótt,
bílana fljúgandi og sólina bleika.
Ég myndi leyfa öllum að hlaupa á göngum
og tala hátt, vera úti eða inni.
Ég myndi leyfa allt.
Og allir mættu ráða hvort þeir skrifuðu
stóran eða lítinn staf.

Þórdís Tryggvadóttir 7.EÁ

Frá skólastjóra

Fréttabréf Flataskóla er gefið út sameiginlega af skólanum og foreldrafélagi skólans. Starfsfólk skólans metur mikils þann stuðning sem foreldrar veita skólastarfinu.

Starfið í skólanum er fjölbreytt og stöðugt unnið að því að skapa nemendum sem best skilyrði til náms.

Margir ánægjulegir viðburðir hafa verið í skólanum á liðnum mánuðum. Nokkrum þeirra verða gerð sérstök skil hér í fréttabréfinu. Skákmót Flataskóla var haldið samkvæmt venju og var góð þátttaka í mótinu. Skákmeistari skólans er Halldór Kári Sigurðarson 7. SG. Ljóðasamkeppni var haldin og sendu allir nemendur ljóð í keppnina. Verðlaunahafar lásu ljóð sín á glæsilegri ljóðahátíð sem fram fór í hátíðarsal skólans. Gestur ljóðahátíðarinnar var Aðalsteinn Ásberg Sigurðsson, rithöfundur. Verðlaunaljóðið er birt á forsiðu fréttabréfsins.

Fréttir af skólastarfinu eru birtar á heimasíðu skólans og einnig hafa allir árgangar sínar heimasíður.

Verkefnið Vinaleið hélt áfram í haust í umsjón Jóhönnu Guðrúnar Ólafsdóttur djákna. Nokkur umræða fór fram í fjölmiðlum um Vinaleiðina. Jóhanna Guðrún tók persónulega ákvörðun um að hætta störfum við Vinleiðina 1. nóvember og eru henni færðar bestu þakkir fyrir samstarfið. Þar með hefur verkefnið verið lagt niður í skólanum.

Niðurstöður Pisa könnunar hafa verið kynntar. Þar kemur fram að árangri íslenskra nemenda hefur hrakað frá árinu 2000. Þessar niðurstöður eru áhyggjuefni og brýnt að unnið verði með þær og leitað skýringa. Þess má geta að endurskoðun Lestrarstefnu Garðabæjar er að hefjast.

Einnig hefur borist skýrsla um rannsóknina Ungt fólk 2007 – Grunnskólanemar þar sem kannaðir eru hagir barna og ungmenna. Rannsóknin var lögð fyrir nemendur í 5., 6., og 7. bekk í öllum grunnskólum landsins. Niðurstöður er varða nemendur í Flataskóla munum við skoðaða sérstaklega.

Flataskóli fagnar 50 ára afmæli 18. október 2008. Undirbúningur afmælisins er að hefjast og verður þess minnst með viðeigandi hætti.

Tveir starfsmenn munu láta af störfum við skólann um áramótin. Það eru þau Hólmfríður Valdimarsdóttir leiðbeinandi í Krakkakoti og Hörður S. Hrafnaldal húsvörður. Þeim eru færðar bestu þakkir fyrir samstarfið og óskum við þið þeim velfarnaðar í nýjum störfum. Yousef Daniel S. Mohammad hefur verið ráðinn húsvörður, en hann hefur starfað við skólann sem skólaliði og leiðbeinandi í Krakkakoti.

Starfsfólk Flataskóla færir nemendum og foreldrum bestu þakkir fyrir samstarfið á haustönninni.

Skólabókasafnið

Starfsemi skólasafnsins hefur verið fjölbreytt það sem af er vetri. Verkefnavinna nemenda á safninu hefur verið töluverð og farið vaxandi sem er mjög ánægjuleg þróun. Nemendur sækja mjög mikið á safnið til þess að ná sér í lesefni bæði sér til ánægju en einnig í tengslum við námið og úrvinnslu verkefna. Lestur og lestrarhvatning er afar mikilvægur þáttur í starfsemi safnsins en markmiðið er að gera nemendur skólans að áhugasömum lesendum jafnt á skáldrit sem fræðirit. Góð lestrarkunnátta er undirstaða fyrir góðum námsárangri nemenda til framtíðar. Skólasafnið stendur því fyrir ýmsum lestrarhvetjandi viðburðum til þess að örva nemendur til þess að lesa og styrkja lestrarkunnáttu sína. Allir nemendur í 3.-7. bekk Flataskóla hafa tekið þátt í lestrarátaki nú á haustönn. Hvert átak hófst á skólasafninu og stóð yfir í eina viku í senn. Lestrarátök sem þessi hafa verið haldin mörg undanfarin ár í Flataskóla en aldrei hefur tekist eins vel til og í vetur enda settu nemendur sér metnaðarfull markmið sem allir náðu og margir gott betur. Nemendur lesa gríðarlega mikið í lestrarátaki og það ánægjulega er að flestir láta ekki staðar numið heldur lesa áfram af fullum krafti eftir að áttakinu sem slíku lýkur. Sérstakt lestrarmaræðing var haldið á safninu fyrir nemendur í 7. bekk á haustdögum og gistu þá nemendur eina nótt með bekkjarkennara sínum og bókasafnsfræðingnum á skólasafninu. Í lestrarmaræðingunni var lesin bókin *Margt býr í myrkrinu* eftir Þorgrím Þráinsson. Mikið var lesið þessi kvöld enda lesefnið mjög spennandi.

Heimsóknir rithöfunda í skólann vekja ávallt áhuga nemenda og eru til þess fallnar að ýta enn frekar undir áhuga nemenda til þess að lesa sér til ánægju. Á haustönn komu Kristín Steinsdóttir og Brynhildur Þórarinsdóttir og ræddu við nemendur í 5. og 6. bekk. Þemað hjá rithöfundunum að þessu sinni var víkingar, ambáttir, kempur og konungar en þetta efni tengist einmitt námsefni nemendanna. Auk þess hafa ýmsir viðburðir verið á skólasafninu á þessari önn og má þar m.a nefna



Bangsavíkuna og Norrænu bókasafnsvíkuna. Nánari upplýsingar um starfsemi safnsins er að finna á heimasíðu skólasafnsins.

Fréttir frá foreldrafélagi Flataskóla

Foreldrafélagið hefur haft í nógu að snúast undanfarna mánuði. Í byrjun skólaársins hittust börn og foreldrar í blíðskaparveðri sunnudaginn 2. september og áttu saman skemmtilega stund við ýmsa leiki.

2. október hittist foreldrafélagið í heild sinni á fundi, þ.e. bekkjarfulltrúar og stjórn foreldrafélagsins. Þar var farið yfir starfsáætlun vetrarins og rætt um starf í bekkjunum, svo sem um gerð og framkvæmd foreldrasamninga.

2. nóvember stóðu skólinn og foreldrafélagið sameiginlega að veglegri þjóðahátíð undir yfirskriftinni „Börnin okkar“. Börn, foreldrar og starfsfólk lögðu mikla alúð og vinnu í hátíðina, enda tókst hún einstaklega vel.

8. nóvember var haldið námskeið fyrir foreldra og nemendur í 7. bekk. Páll Ólafsson, unglingaráðgjafi, kom og ræddi við börn og foreldra um samskipti. Deginum lauk svo með kvöldvöku.

25. nóvember hittumst við í skólanum, skárum út laufabrauð, skreyttum piparkökur og bjuggum til jólakort.



Í janúar verður boðið uppá pantanir á skólafatnaði, þ.e. Henson-göllum og flíspeysum líkt og verið hefur undanfarnar annir. Þó er hugsanlegt að úrvalið verði eitthvað aukið – meira um það þegar þar að kemur. Það skal það tekið fram að foreldrar hafa val um kaup á skólafatnaði og að framtakið er alfarið að frumkvæði foreldra.

Í mars verður sameiginlegur fræðslufundur foreldrafélaga grunnskólanna í Garðabæ. Nánari dagsetning og efni fundarins verður auglýst þegar nær dregur.

Í maí verður aðalfundur foreldrafélagsins. Dagsetning og dagskrá auglýst síðar.

Við óskum öllum gleðilegra jóla. Að lokum minnum við svo á foreldrafélagsgjaldið, sem er 1.000 kr. fyrir hvert heimili. Vinsamlega leggið inná reikning foreldrafélagsins: 0546-14-602268 kt. 6911022620.

Upplýsingar um foreldrafélag Flataskóla er að finna á heimasíðu skólans, undir flípanum „Foreldrafélag“.



Tónmennt

Dagur íslenskrar tungu var haldinn hátíðlegu 16. nóvember síðastliðinn. Dagskráin var unnin og flutt af öllum nemendum skólans frá 1. upp í 6. bekk. Nemendur úr 7. bekk sáu um kynningar og upplestur á milli þátta, þar sem stiklað var á stóru í lífi og starfi Jónasar Hallgrímssonar. Dagskráin fór í alla staði mjög vel fram og var það mál manna að nemendur



skólans hefðu staðið sig framúrskarandi vel, bæði sem flytjendur og áheyrendur. Dagskráin var borin uppi af tónlistaratriðum og spuna-leik sem nemendur höfðu æft frá lokum ágústmánaðar. Íslenskar þjóðvísur, lag og texti Bubba Morthens og ljóð Jónasar Hallgrímssonar við lög ástsælla tónskálda ómuðu um skólann á 200 ára afmæli þjóðskáldsins. Dagur íslenskrar tungu hefur náð traustri fót-festu í skólamenningu Flataskóla, eins og í raun í samfélaginu öllu og ber hátt í annars metnaðarfullu listalífi skólans.



2. bekkur fór í fylgd um-sjónarkennara og tón-menntakennara í heimsókn til Áslaugar Ólafsdóttur og Halldórs Vilhelmssonar 30. október. Halldór er mikill völundur og smíðar langspil á verkstæðinu sínu í Furu-lundinum í Garðabæ og notar til þess tré úr garði þeirra hjóna. Halldór fór yfir helstu gerðir trjáa sem henta til hljóðfærasmíða.

Að lokinn fræðslu og fróðleik um langspilið var gestkomendum boðið upp á heitt kakó og smákökur úti í garði.

Ljóðað í lurkinn er verkefni sem er unnið í 4. bekk og á rætur í skóglendi, rjóðri eða lundi. Þar sem Flataskóli er vel í sveit settur og stutt er í Vigdísarlund, þá verður útikennslustofa tónmenntar í 4. bekk staðsett í lundinum. Ætlunin er að rannsaka lundinn með augum spegilsins og túlka sýnina á hljóðfærum í tónmenntastofunni. Þar sem lundurinn er í ólíkum klæðum á skólaárinu ættu að fást fjölbreyttar sýnir í gegnum skáldaspegilinn á þennan fallega stað og áhugaverð tónverk samfara því.



Eldri deild kórskólans söng á stórafmæli Glitnis í Garðabæ 26. nóvember. Nemendur sungu fyrir starfsfólk, gesti og gangandi úrval laga sem æfð hafa verið í kórskólanum í vetur. Sungið var á þremur tungumálum í ólíkum stíltegundum. Söngur nemenda gladdi marga og erum við þakklát fyrir að fá tækifæri sem þetta til tónlistarflutnings fyrir utan skólann og leggja okkar af mörkum til nærsamfélagsins.

Yngri deild kórskólans söng á Garðatorgi 1. desember þegar ljósin á jólatré Garðbæinga voru tendruð. Nemendur fluttu nokkur jólalög af þjóðlegra taginu og tóku síðar undir með jólasveinunum sem komu í heimsókn og stigu á stökk. Það var mikið ævintýri fyrir kórskólann að syngja í hljóðnema og tengjast rafmagni í fyrsta sinn. Tveir nemendur aðstoðuðu við að tendra ljósin á trénu, Ingibjörg Einarsdóttir og Jan Getz Jóhannsson.

Helgileikur Flataskóla verður fluttur af nemendum 5. bekkja í Vídalínskirkju, sunnudaginn 16. desember n.k. Helgileikurinn er unnin í tónsmiðju skólans og er verkefnið sjálfstætt framhald af Kumli og haugfé. Á vorönn vinna nemendur að Fjölbjóðaverkefni sem nefnist *Einn heimur*. Verkefnið byggir á friðarhugsun, mannkærleika og samkennd og að kunna að setja sig í spor annarra. Farið verður í ferð út í Viðey til að skoða Friðarsúluna og kynnast starfi samtímalistamanna sem leggja út frá friðarhugsun í listsköpun sinni.

Hjördís Ástráðsdóttir, tónmenntakennari

Jólaskemmtanir verða fimmtudaginn 20. desember.

Nemendur mæta í bekkjarstofur og fara með umsjónarkennara í hátíðarsal. Vinabekkir eru saman á skemmtun.

Kl. 9:00-10:30

1. HG - 5. EP
2. MH - 5. ÓS
3. RG - 6. EM
4. OS - 7. EÁ

Kl. 11:00-12:30

1. ÁS - 5. HL
3. HM - 6. RF
3. KÓ - 6. HSG
4. OP - 7. SG

Opnun tómstundaheimilis Flataskóla

Tómstundaheimili grunnskóla Garðabæjar verða opin í jólaeyfi eins og auglýst hefur verið. Boðið verður upp á dvöl frá kl. 8:00 – 17:00 alla þessa daga, annað hvort hálfan dag eða heilan dag. Foreldrar hafa fengið bréf heim með upplýsingum um það og síðasti dagur skráningar var 7. desember.

**Kennsla að loknu jólaeyfi hefst
mánudaginn 7. janúar 2008**

Starfsfólk Flataskóla sendir nemendum og fjölskyldum þeirra bestu óskir um gleðiríka jólahátíð og farsæld á komandi ári.

Upplýsingar: Allir eru hvattir til að fylgjast með skólastarfinu á heimsíðu skólans <http://www.flataskoli.is> en við reynum eftir fremsta megni að uppfæra upplýsingar og koma tilkynningum á framfæri ásamt pósti til foreldra/forráðamanna eftir því sem við á.

Flataskóli við Vífilsstaðaveg

Sími: 565-8560

Fax: 565-7499

Netfang: flataskoli@flataskoli.is

Heimasíða: <http://www.flataskoli.is>

Útgefandi: Flataskóli

Ábyrgðarmaður: Sigurveig Sæmundsdóttir

Ritstjórn: Stjórnendur Flataskóla

